

拳匪紀事

卷五

魏國紀事

卷三

拳匪紀事卷五

日本佐原篤介

同輯

浙西漚隱

通論

義和拳教門源流考

知吳橋縣勞乃宣著

那文毅公彥成奏疏

奏爲遵 旨查辦並將先已訊出端倪奏明密拿事竊臣於十月三十日承准軍機大臣字寄十月二十九日奉 上諭王秉衡卽王景曾其族分住直隸灤州及盧龍縣等處以大乘教清茶門分往外省傳徒歛錢茲王秉衡自直隸至楚省復來江南柳有賢轉傳金棕有傳至逆犯方榮升釀成巨案該犯實爲首禍現已拿獲解赴湖北訊明嚴辦昨據那彥成奏於盧龍緝獲王殿魁等犯並查提王姓充徒各犯分別審辦石佛口王姓一族世傳邪教歷年久遠蔓延數省現已屢次犯案着那彥成卽派委幹員前往灤州及盧龍等處將王姓族中傳教之人全數收捕勿令兔脫一名解至省城嚴行審訊訊明後將爲首傳徒者問擬絞決其爲從

者分別發遣流徒并向各該犯家中嚴密搜查將所藏九蓮如意皇極寶卷真經元亨利貞鑰匙經及一切邪悖經卷全行起出封送軍機處呈覽務令盡絕根株勿稍留遺孽除惡務盡切勿姑息欽此伏查臣前在河南辦理教匪所有拿獲教犯逐漸審訊彼時卽係盛泰等隨同辦理臣卽屢諭盛泰等令將各處習教之人何處最多傳至何人逐人訊問逐件留心以備查辦務絕根株庶免別滋事端而盛泰亦最肯用心存記又在保定府任內審辦邪教最多是以直省傳習邪教源流惟臣與盛泰稍知梗概今欽奉 諭旨謹據臣等所知略爲陳叙當日據獲到教匪各供滑縣鬧事之人俱係震卦教凡有在教者均稱爲東方震宮王老爺門下其王老爺係首先傳教之山東荷澤縣人王中已於乾隆三十七年犯案正法林清徒黨多係坎卦教凡有在教者均稱爲北方元上坎宮孔老爺門下其孔老爺係首先傳教之山東寧陽縣人孔萬林亦已於王中案內正法至大乘教金丹八卦教義和門如意門等教凡有在教者均稱爲南方離宮頭殿真人邵老爺門下其邵老爺係首先傳教之河南商邱縣人邵生文已於乾隆三十六年犯案正法又訊有清茶門教係滑縣人王正紀所傳當卽拿獲辦理訊係灤州石佛口王

姓分支當時卽已飭令密記存查臣於到任後查辦各項教匪查得嘉慶十六年經溫承惠審辦過鉅鹿縣民孫維儉等係以吳二瓦罐所傳之好話教卽離卦教改名大乘教賄串孔傳標借修尼山祠宇爲名惑衆歛錢一案將大會首孫維儉等五名分別擬以絞決監候二會首宋連捷等九十餘名連吳二瓦罐一併擬遣其散會首盧珍明等一千六百三十餘名奏准取具悔結存記檔冊再犯加等治罪十七年又經溫承惠拿辦過前案內散會首復圖興教私雕僞寶印蓋護道榜文之劉幘名等三十餘名口分別斬決發遣是年又拿獲灤州李家民董懷信等三十餘名傳習金丹八卦教審出曾經入教男婦五千一百餘名將董懷信等分別斬決發遣其餘男婦取具悔結存案十八年冬大乘教案內擬絞監禁之大會首李經在監勾結同教田克岐散旗謀逆經署督臣章煦及臣在軍營訪聞分起委員拿獲李經等奉旨當下辦理旋又究獲八卦教內首要逆犯張九成楊遇山宿元謨劉坤并河南離卦教首郃生文之孫郃坦炤劉功等分案奏明擬以凌遲斬遣惟查愚民私相傳習邪教一時原難稽查是在地方官時刻留心於曾犯教案之犯曾經習教之家不動聲色嚴密稽查務使不驚不擾隨案究其源流庶可

斷其傳習臣仰荷 皇上畀以畿輔重任秉成指示夙夜實力整飭不敢稍存疏懈斷不肯令邪慝復萌釀成巨案除陸續拿獲滑縣潛逃從逆各犯並林清案內應行緣坐餘黨不叙外其離卦一教仍未改悔之案如所獲平安縣傳習離卦教之楊俊等究出首先傳教吳二瓦罐之子仍稱少當家之吳洛雲並其徒大頭目路運等一案交河縣傳習一炷香離卦教之齊聞章等搜出遞背十王經卷一案滄州吳久治路老等傳習佛門教一案青縣季八葉幅明等傳習義和門教一案又青縣邊二從習白陽教預知逆情一案景州葛華等從習離卦教預知逆情一案祁州邢士魁等傳習如意教搜獲妄造表名掛號總冊一案故城縣葛立業傳習義和門拳棒預知逆情一案均經訊明教名雖別俱係離卦教之子孫徒黨逐起奏明分別凌遲斬遣在案現又訪獲青縣尤明等傳習義和門離卦教一案束鹿縣馬楊氏傳習紅陽教搜飄高老祖經一案亦經奏明從嚴究辦至石佛口王姓傳教一案臣先卽存記前在湯山差次面奉 諭旨飭拿赴楚傳教之王姓當經臣派員在盧龍縣安家樓莊訪獲自江南回籍之王殿魁並其子王朝萬二犯提省嚴訊據王殿魁供認於乾隆五十七年卽在淮安漂水泗州江甯等處傳徒

伊卽在山陽開糧食店五六年回家一遍據供出伊族人在湖北傳教共有三人一名王書魯一名王泳太一名王興建王書魯先在江南儀徵縣傳教卽在彼住家王泳太王興建俱在盧龍縣安家樓莊住又有在山西傳教犯案王如青之子小名來子伊族石佛口有兩支俱在旗分東西兩院王如青是東院人其餘在安家樓莊及闕家莊係屬一支俱係民人等語續又據委員稟在安家樓莊拿獲王三樂王三畏二名訊據供稱伊等均未習教惟伊次兄王三聘又名王紹英曾在山西傳教犯案業已奏辦伊三兄王三顧從前亦往山西回家後旋患瘋迷於本年四月內外出不知去向臣以王三樂王三畏所供全係狡卸且該族之人類多傳教犯案因查從前辦過王烈案內有王際昌王漢倬王秉鈞三犯分發邢臺等縣充徒行司提省質訊至王殿魁供出在湖北傳教之王書魯一犯現准湖廣咨會內開樊萬興案內之王姓卽王大鼻子已准江蘇省拿獲核與王殿魁取供形貌相符其王泳太王興建二犯亦在湖北傳教當卽飛檄各委員飭拿一面奏蒙 聖鑒在案今據百齡等奏將緝獲之王秉衡卽王景曾解楚嚴辦查與王殿魁供出在湖北傳教之王書魯名不相符復提王殿魁研訊據供王書魯原係景

字排行又名王景曾卽王大鼻子屬實等語臣業經咨會湖廣督臣審究至王姓世習邪教分往各省傳徒蔓延數省屢次犯案怙惡不悛且灤州盧龍等處附近京畿並係盛京往來要路斷難容習教匪犯潛踪誘煽誠如聖諭必當將該族習教之人全數收捕分別懲辦嚴密搜查邪悖各經卷務令盡絕根株不使稍留餘孽臣前經派委保定府同知汪洞前赴該州密拿已據獲到教犯王三樂王三畏王鳳吉王來子等四名已飭提省審辦並仍令該員在於該州石佛口盧龍縣安家樓及闕家莊等處實力查拿現又恭錄聖諭密剖前委查勘永平府屬一帶道路之清河道韓文綺令其遵旨就近督拿該族習教之人並搜查各項邪悖經卷解省嚴行訊辦斷不敢稍存姑息以期仰副聖主除惡務盡之至意謹奏嘉慶二十年十一月初三日

右嘉慶十三年

諭旨一道乃義和拳奉旨查禁懲辦明文

已恭錄首卷此不重載

嘉慶二

十年那文毅公奏疏一道內載義和拳教源流及歷次拏辦成案按義和拳一門乃白蓮教之支流其教以練習拳棒爲由托言神靈附體講道教拳詭稱念誦咒語能禦槍砲有祖師及大師兄二師兄等名目其爲邪教形迹顯然那文毅公疏

中考明其爲離卦教之子孫徒黨歷述獲辦過青縣季八葉幅明等傳習義和門教一案故城葛立業傳習義和門拳棒預知逆情一案青縣尤明等傳習義和門離卦教一案均分別擬以凌遲斬遣等罪此義和拳實爲邪教之確切證據也其黨自嘉慶年間懲辦以後根株迄未盡絕直東兩省各州縣所在多有初猶斂戢近漸明目張膽無所忌憚上年冠縣等處義和拳黨類與天主教民爲仇竟至聚衆抗官重煩兵力是其逆跡已經彰著乃彼黨揚言專仇教民不擾良善而民教不和之處良民遂多爲所惑因而忘其降神誦咒之爲邪術悞以爲出於義憤隨聲附和羣相信從官府以民教相爭之故懼稍偏袒有拂輿情遇事輒曲爲調停不敢昌言查禁甚至加以義民之目以致愈釀愈熾滋蔓難圖其實此項教門名目於乾隆年間已見章奏是時天主耶穌教猶未通行其非因仇教而始起可知其與教民爲難非果仇其教也乃窺見民教不和之隙假以爲名托詞公憤聳動羣情以掩其聚衆結盟之迹而行其煽惑招誘之謀耳若其本意則實有謀爲不軌之心愚民無知誤被誘惑至於身陷重辟而猶不自知其情殊屬可憫此皆由於不知其教派源流根柢之所致也若知其本爲應禁邪教誰肯信而從之以身

試法哉

勞大令義和拳教門源流考書後

義和拳教門源流考刻既成客曰子之是作將以正人心肅統記救時變弭亂端意甚盛也然自嘉慶以來此黨之私相傳習已數十年無非誘惑鄉愚藉爲橫行牟利之計必謂其有不軌作亂之虞得勿過甚予曰大凡邪教之興初不過斂錢牟利繼則恃衆橫行迨黨與漸盛羽翼既成再有藉口之端相激之勢一旦揭竿而起則逆謀成矣義和拳之名初不甚著蓋其行藏詭秘猶畏人知及冠縣一帶仇教事起託詞義憤其釁始張愚民無知從而附和其勢益熾官旣不能持情法之平以伸良懦之氣又不知正邪教之名以破愚頑之惑於是益相糾結以肆橫而抗官至官不能耐一撓其鋒卽猝然而發如平原之事列隊千人開放大礮官兵匪首朱紅燈自稱明裔逆跡昭著不待言矣其他官傳拳民其黨數百齎聚堂下官卽噤不敢問者有之官出資設席兩解拳教者有之擁衆千百槍械林立動言焚殺官吏莫放誰何紀綱法度蕩然無存不亂何待今荏平又啓釁矣平原之變但掠教民荏平則掠及平民其黨旣衆無以爲食非擄掠不能給其不得不反

者勢也旱象已成人心畏亂失此不圖廣西金田之禍可爲前鑒予之是作但正其邪教之名使人人共曉自能父詔兄勉互相誥誡不爲所動卽偶有一二曾被誘惑者亦將匿跡銷聲不敢復犯若其勢已盛其釁已深卽非倉猝所能爲力矣曰然則以重兵誅之乎曰不必然也其黨以習拳爲號八卦教之名隱而不露其逆謀左道授受淵源惟爲首同謀梟桀之輩知之非特外人不知卽被誘入教者亦不盡知故莠民之狡者從之良民之愚者亦從之各處拳黨儘有衣冠之族殷實之家非盡游手此皆由於不知其爲邪教誤爲所惑使灼然知其爲邪教誰肯從之此等鄉愚若概以邪教之罪罪之未免情輕法重且人數旣衆操之已蹙亦恐激出事端然其易於惑衆在此其易於解散亦在此予故考其源流始知義和拳卽八卦教之支派嘉慶年間曾經奉 旨明禁查辦有案爲今之計惟有普加勸諭斥爲邪教嚴行禁止其愚民無知誤被誘惑者勒限首悔免其治罪此後再有傳習者照例懲治專就查禁邪教立言不必涉及西教刊刻告示廣爲頒發州縣邀請公正紳士分赴城鄉逐處開導有誤從其教者一律改悔不必照例赴案自首當卽具結不准出一票派一差以杜滋擾如此則被誘良民自必真心悔悟

卽怙惡不悛之輩亦必隱諱不敢昌言革心者半革面者半而其黨之勢自銷然後按捕其不率教者倘敢抗拒其勢已孤臨以兵威無不克者曰其黨以扶中朝滅洋教爲詞平民有受教民欺壓者入其教卽可抵制故羣相信從有義民會之稱是民目之爲義民也上年東省委員訪查謂其習拳專爲自衛身家其中各種技藝無不精妙從未恃強生事稟中有義氣相尙心必直爽路遇不平不惜軀命代爲伸理及設法勸導化私爲公俾其有勇知方可儲爲異日有用之材等語是官目之爲義民也官民皆目之爲義民而子獨目之爲邪教不亦大拂人情乎且西人之欺我甚矣藉此亦可爲抵制之道又其人有能禦槍炮之說果有此術收爲國家之用豈不甚善子必欲力爲遏絕何也曰父兄爲強鄰所制子弟不能振興門戶徒逞怨忿私相關詈轉使父兄受侮豈孝子悌弟乎今之仇教者何以異是况保護教堂累奉 明旨而敢顯違 詔令與教堂爲難是亂民也何義之有教民與平民同爲中國赤子同爲中國管束約章具有明條大小官吏當堅守約章力持公道何必仗亂民爲護符哉至於能禦槍炮之說尤屬荒誕有見其演於市者一人袒而立一人持槍擊之無所損此正戲術家吞刀吐火之類非手法卽

藥物耳弊在施槍之人與所用之槍若易他人以他槍擊之必不驗矣彼黨仍在景州試演自斃一人蓋手法一時失誤而其黨遂誣稱教堂鎮壓所致幾與教堂生釁假如教堂果能鎮壓使之不靈又豈能敵外國平原之役中槍炮而死者二十餘人尤爲不能禦槍炮之明驗謂可收爲國家之用愚人之見也曰天主耶穌之教亦異端也義和拳與伯仲耳何分軒輊而子必抑此而揚彼何也曰異端與邪教不同邪教小則惑人大則肇亂此所謂造言惑衆不待教而誅者也余非右西教也教民不作亂拳民作亂所以異其施也曰專就禁止邪教立言而不涉其與西教爲仇何也曰其仇西教乃借名聳動之術本心實在惑衆以作亂不言仇西教誅其心也愚民之爲所惑者誤以其仇教爲義憤若專罪其仇教適足以激衆怒而固黨援則正墮其術中今不問其仇西教與否但斥其爲邪教而禁之則民間曉然於上之非袒西教可以消釋羣疑解散黨羽且遇有教案交涉亦易措手何也拳黨終日揚言燒教堂殺教民教民懼爲所乘時時防之偶有疑似或有他嫌卽以危詞聳動教士挾制官府其實毫無憑據大都因別事生隙者居多若曲徇教士之請橫加之罪則彼實無辜旣不足以服衆人之心若秉公裁斷不徇

教士之意而彼黨實有燒燬之言又不足以釋教民之懼而折服其口勢處兩難能者束手今於居恒無教案之時卽以邪教示禁遇有教案告西人曰義和拳大千例禁乃我內政不關交涉應由我自行處置其教案當就事論事持平斷理與禁止義和拳無涉彼見我果禁義和拳並無縱庇傷害之意不生疑懼之心自不致強行干預無理要挾我於教案乃可一秉大公但論曲直不分民教則操縱自如不致動生窒礙微權妙用皆在劃清界限之中曰昔曾文正公辦哥老會匪告示有云但問其爲匪不爲匪不問其在會不在會實爲解散脅從消除反側良法今拳黨滋事皆由仇教則亦當但問其仇教不仇教不問其邪教不邪教而子之持論適與相反何也曰哥老會在會之人皆自知拜會爲犯禁之事不敢明告於人至於爲匪尤爲顯然之罪人所共知故專辦爲匪者其不爲匪者自然聞風斂跡若一一搜尋反致驚擾生事若義和拳則在會之人並不自知犯禁方且明目張膽不畏人知其仇教又以義舉自命若專罪其仇教必致激而愈甚惟正其邪教之名使人人共曉則其氣燄自然衰熄故但問其邪教不邪教不問其仇教不仇教則相反正相同也且近來部定哥老會匪章程爲首開堂搶刦擾害者就地

正法雖經入會並非頭目者監禁擊杆無知被誘被罪自首者免其究治非果終不問也今擬義和拳辦法亦以改悔免罪爲主非欲一一治其罪也曰仇教實事也邪教虛名也舍實事而爭虛名無乃迂濶而不切事情乎曰人心向背全繫乎名名之所在人必從之彼之仇教亦名也其實事乃作亂耳彼托乎仇教之名以行其作亂之實民遂忘其作亂之實而專惑其仇教之名其所以煽動人心若是之易者全恃乎所托之名今正其本然之名以破其所托之名則人心之惑解而所恃之端失其黨渙其勢孤矣非迂圖也名不正則言不順言不順則事不成是正其邪教之名實今日弭亂之上策也曰中外交涉爲當今最重之務拳黨又恃與教堂爲難而子轉輕視仇教何也曰非輕仇教也有更重於仇教者在也四方之教案多矣大抵皆由一時一事相激而起無與官爲敵之心也故但須專理教案教案結而其事畢矣今義和拳則不然其處心結慮在乎聚衆而抗官傳單一出千人立聚兵刃森列儼同敵國官與講勸則肆意要求官且如奉驕子如撫叛軍兢兢焉惟恐稍失其意但求勉強遷就塗飾耳目苟免外人之責言卽爲萬幸損威敗紀導逆長奸皆所不顧故教案結而禍益深今日之患皆歷次教案敷衍

之事所釀成也蓋抗官之罪甚於仇教仇教不過私鬪之事抗官則爲後日之憂故曰非輕仇教也有更重於仇教者在也果使辨邪正之名明上下之分綱紀肅清民有定志尙何教案之足慮哉謹次問答之語以俟知者擇焉

關邪芻言

關邪錄

黃天當立乎白水當興乎彌勒佛當降生乎圖讖荒唐我朝積德累仁斷無慮此譎張爲幻惟是異端披猖少見多怪之黔愚竟一倡百和而信爲緩急足恃要宜修政以應之辨惑以靖之力持定見勿信浮言以鎮之有以遷都之說進者是欲宋高宗我皇上也有以監國之說進者是將唐明皇我皇上也非苟全性命卽自便私圖均之罪無可逭者也方今北省雖遍地荆棘官民苦膺瘡痍然烏合之衆徒夫已不難剋期以翦滅況南省聯絡一氣餉贍兵精足寒敵膽迴天心初非空言無補者所可同日語也不觀元韓林兒乎僭號十二年卒俯首受縛也不觀明徐鴻儒乎經營二十年徒黨二百萬卒延頸就戮也不觀本朝王倫劉之協林清宋維明乎或截蓮道或擾行省或勾通闍寺乘隙闕於內或憑據圩砦恃險跳於外卒之虎將視師旌旆變色割若籠中之獸炙若釜底之魚一切誕

術妖言舉無由施其伎倆也大劫將臨初難驟挽及原野厭膏血肉薄禦鋒鏑乖戾沴毒之氣潛移默化譬如疾風掃垢埃焉撥雲霧而見青天則戈予劍戟之相加違容擾鋤棘矜之縱暴幸值 天子當陽諸臣用命一清 君側羣慶 中興此正撥亂反正之時慎無膠膠擾擾遊移其見陷入於歧途以遺譏於不學無術且自貽伊戚也

兩造涉訟有原告有被告要皆有可以指名之人事之地從未聞憑空結撰不呈一詞曰我與彼仇輒聚衆報復至殺人放火毫無忌憚者也如義和拳匪一人曰仇教人人曰仇教究竟所仇何人東洋乎西洋乎所仇何事田土乎房產乎所仇何地山東乎直隸乎奉天乎所仇何教天主乎耶穌乎希臘乎其初告之地方官准乎駁乎其上控之本管道府伸理乎屈抑乎其定案之藩臬督撫達之 朝廷者準經行權乎抑中袒外乎使援被告例逐層指詢於若原告之義和拳匪竊恐與教有仇者自有其人彼義和拳匪不過欲昌其離卦教以揚白蓮香逆猷而自將大有作爲耳是何異憑空結撰不呈一詞曰我與彼仇輒聚衆報復殺人放火肆無忌憚者也夫事不干己挺身作證是謂扛幫訟痞聯盟結會持械橫行是